

**Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarneq pillugu inatsisip (Kinguaassiuutitigut pinerluttarnerit il. il.) allanngortinneri pillugit inatsisissatut siunnersuummut missingiummut Namminersorlutik Oqartussat isumaqataanissaat pillugu Inatsisartut aalajangiiffigisassaattut siunnersuut.**

(Isumaginninnermut Inatsisinillu Atuutsitsinermut Naalakkersuisoq)

Siumup pingaartilluinnarpaa inuiaat inatsisitigut illersugaanerisa qulakkeersimajuarnissaa. Taamaattumik Siumup eqqartuussiveqarnerup pitsanngorsarneqartuarnissaanut sulinermut peqataassaaq peqataajuassallunilu.

Naalakkersuisut saqqummiussisutaanni nunatsinni kinguaassiuutitigut atornerluinerit ajornartorsiuataangaatsiarnerannik oqariartuuteqarnerat Siumumiit eqqortuuneranik naqissusiiffigissallugu oqariartorusuppugut. Kinguaassiuutitigut atornerluisarnerit eqqarsaatigalugit kisitsisit saqqummiunneqartartut takutittarpaat ajornartorsiut annertoorujussuusoq, aali ilaannaasa nalunaarutigineqartarnerat suliassanngortinneqartarnerallu piviusuugaluartoq.

Siumumi isumaqarpugut kinguaassiuutitigut atornerluisarnerit kanngutsaatsuliortarnerillu inuiaqatigiulluta akuerinngisaannarigut akuersaanngisaannassallugillu. Siumumittaaq isumaqarpugut ajornartorsiummut taama annertutigisumut akiuiniarluni sulinermut sakkut sulluunniit iluaqutaasinnaasut atorlugit ingerlasariaqartugut pisariaqarfiisigullu sukaterisariaqartugut, inuiaqatigiillu tamatta peqatigiilluta kinguaassiuutitigut innarliisarnerit akiortuarneqarnissaannut pitsaaliuinermillu suliniuteqartuarnissamut suleqataasariaqarnerput akisussaaffigatsigu.

Kalaallit Nunaanni Eqqartuussisarnermi aammalu Pinerluttulerinermi Inatsit 1. januar 2010 aallarnerfigalugu atuutilersinneqarput Eqqartuussiveqarneq Pillugu Ataatsimiititaliarsuup ukiorpaalunni suliaqareernerata kingunerisaanik.

Inatsisunik atuutsitsinermut oqartussaaffik ilisimasatsituut Naalagaaffiup ataani suli inissisimavoq, taamaattumillu suliassanut taakkununga tunngatillugu allannguinnisanik siunertaqartoqartillugu nunatta tusarniarneqaqqaartarnera taamalu siunnersuutitut missingiusianut isumaqataanissat qulakkeerniarlugit Inatsisartut oqaaseqaateqarnissaat matumuunakkut qulakkeerniarneqarpoq.

Aalajangiiffigisassatut siunnersuummi matumani siunertarineqartut pingarnerit, tassalu innuttaasut ataasiakkaat pitsaanerusemik illersorneqarnissaat siunertarineqarmat Siumumiit tamakkiisumik tunuliaqutsiinissarput matumuunakkut nalunaarutigissavarput, taamatullu aalajangiiffigisassatut siunnersuutip massumap akuersissutigineqarneratigut meeqqat kinguaassiuutitigut atornerlunneqarsinnaanerannut kannguttaatsuliorfigineqarsinnaanerannullu illersuinissamut annertuumut tapersiissutaasussaammat Siumumiit qularata tunuliaqutsiinissarput matumuunakkut nalunaarutigaarput.

Taamatullu Kalaallit Nunaanni pinerluttulerinermi inatsimmi aammalu Kalaallit Nunaanni eqqartuussisarnermut inatsimmi ilaatigut taaguutininik arlalinnik ullutsinnut naleqquttunngorsaaniarnerit inuiaqatigiit ineriartornerannut naleqquttutut isumaqarfigigatsigik Siumumiit allannguiniarnerit isumaqataaffigaagut, kiisalu inatsisit arlalitsigut oqaasertaasigut allanngortinnissaat aqutugalugu kinguaassiutitigut inunnik siammasinnerusumik illersuinernik siunertaqarnerat Siumumiit pitsaasutut isumaqarfigaarput, inuiaat tassuunakkut amerlanerpaat illersorneqarnissaat qulakkeeqataaffigineqarsinnaammat.

Naggataatigut Naalackersuisooqatigiit siuliisa siulii *Inatsisinik atuutsitsinernut suliassaqarfimmi periusissatut suliniutissatullu pilersaarut* suliarisimasaat Siumumiit pitsaasutut isumaqarfigisarput tunngavigalugu suleriaqqinnissap timitalersorneqarnissaa qulakkeeqataaffigerusupparput, taamaalilluta suliassat unammilligassarpassuaqarfiusut pingaarnersiuiinikkut pitsaaasumik innuttaasunut atugassaqartitsinissaat qulakkeersinnaagatsigu.

Siumumiit taamatut oqaaseqarluta siunnersuut manna akuersaarlugu aappassaaneerneqarnissaa sioqqullugu Inatsisinut ataatsimiititaliamut suliassanngortinneqarnissaa inassutigaarput.

Anders Olsen, Siumut